

DISSERTATIO

De

VOMITU GRAVI-
DARUM,

Quam,

Favente DEO,

PRÆSIDE

DN. ELIA RUDOLPHO CAME-
RARIO, Phil. & Med. D. ac P. P. Consiliario &
Archiatro Württembergico, h. t. Facult. Med.
Decano,

Domino Patrono ac Præceptore suo
ætatem sanctè colendo,

Publicè ventilandam proponit,

h. l. g. c. d. Augusti,

Eberhardt Backmeister / Tubing.

Literis GREGORII KERNERI,
Anno 1682.

Digitized by the Internet Archive
in 2019 with funding from
Wellcome Library

<https://archive.org/details/b30766394>

Q. D. T. O. M. B. V.

Mulierem omnem morbum bis pati vulgò dicunt. Cujus dictorii rationes hîc non examinabo ; Perpendens tamen , quæ in tenera muliebris sexus corpora mollesque habitus sæviunt mala , structuram eorum multoties invertentia , si non penitus corrumpentia , haud pauca , quis non compatietur ? Qualem Tyrannidem agat in eas menstruus nunc depressus , nunc exaltatus fervor , nunc deficiens , nunc solito copiosior fluxus , ipse loquantur miseræ : Quantis agitentur malis maritatæ demum tota die obvium est ; Dicam tantum de tempore imprægnationis , ubi nunc in insolitarum rerum desiderium appetitus eas vocat depravatus ; Nunc nauseabundus earum Venter omnem respuit cibum ; Nunc invertitur quasi & vomere vel tota die , vel statis quibusdam diei horis ac temporibus cogitur : sicco transco pede atrocissimos dolores , quibus ultimis præsertim imprægnationis mensibus , dum foetus fortiori jam jam gaudens motu in suo habitaculo sensim sensimque se ad exitum disponere , ac ita pristinum suum situm mutare , fermentatio ad partum disponens vehementer se exserere , incipit. Singula hæc pertractare ac explicare animus in præsens mihi non est , unum tamen ex hisce symptomatibus gravidis multis maximè familiare ac interdum satis molestum , Vomitus nimirum exercitii Academici gratia , non tractatum sed Theses propositurus , quantum ingenii mei permittit imbecillitas , nunc describam ; Quod ut feliciter cedat , Summi Numinis Directionem & Assistentiam devotis imploro precibus.

THES. I.

ἔμετος, Vomitus , ab ἐμέω , vomo dictus , das erbrechen / übergeben / in genere , quid sit , & unde dicatur , hoc nostrum malum , das erbrechen der schwangern Frauen quid nominatenus velit , simul & quàm variæ & diversæ causæ Vomitus in genere sint , quàm varia , solida , anima-

ta, naturalia, artificialia visa, humorosa diversa, vaporosa plurima per istum ejici observata sint, prolixius recensere meum non est. Thema meum est particularis Vomitus, certa ejusdem species: Non autem iste Mariti *Vix Bohn* nominati qui uxoris suæ, quando gravida facta fuit, personam egit, dum Maritus pro uxore vomebat, & pica laborabat; filium gignens, qui maritus jam factus talia, qualia Pater, seu patiebatur, seu agebat, foemina non vomente, ceu talem observationem communicavit Collectoribus *Ephem. Germ. insertam Ann. 2. obs. 216. Curiosiss. Dn. D. Reiselius Archiater Württembergicus Patronus meus Colendus*, cui *Scholij* loco elegantis quædam ex *Primirofio de error. vulg. in Medicin. lib. 2. c. 13. p. 66.* addita sunt l. c. à *Celeb. Sachsio p. m. vid. Primiros. l. d.* Non ille, cum menstrua turgescencia per Vasa non uteri, sed Ventriculi protrudit sanguinem, qualia exempla *Timaus Cas. Med. l. 4. Cas. 12. p. 211. Eph. Germ. Ann. 1. obs. 95. ac Ann. 6. obs. 49. alibique Alij adducunt.* Vias vide apud *Excellent. Dn. D. Mezgerum, Profess.* Hujus *Academiæ Famigeratissimum Patronum ac Præceptorem meum æternum colendum in diss. ad Aphorism. Hipp. 31. 32. 33. Sect. 5. Them. 2. quest. 4.* Nec, quem cruentum, vase brevi p. n. reſerato, observavit Vomitus *Celeberr. Wedelius dict. Ephem. Ann. 9. & 10. obs. 20.* Nec, quem idem test. *Ann. 3. obs. 7.* feliciter curavit, in multis gravidis cum febre Petechiali & Dysenteria Epidemica junctum. Nec iste, qui Matronæ cuidam salaci, quotiescunque Venerem exerceret, accidit, rejecta materia quadam albicante, modicæ tamen quantitatis, tenuiori semini non absimili, observatus à *Curiosiss. Hertodio Eph. dict. Ann. 1. obs. 4.* Nec denique, qui gravidis etiam quibusdam, ubi mari vel rheda vehuntur, accidit, quia & viris & foeminis quibusdam familiare est malum.

II.

Sed est, de quo acturus brevibus sum, Vomitus Gravidarum, quem describo sequenti modo: Vomitus Gravidarum est excretio fluidorum variorum, nonnunquam solidorum per gulam in gravidis, proveniens à convulsivo Ventriculi motu, dum spiritus animales ibidem irritati à rebus per conceptionem genitis aut motis, molestum per illam expellere conantur.

III.

Excretionem ipsa nominis ratio dicit, & relatio detegit. Plerumque fluida, rarius solida, cibi nimirum inconcocti rejiciuntur. Sub-

jectum

jectum sunt Gravidæ, & quidem hic Ventriculus ac Gula, quod quia hoc malum non experitur, nisi in ipsum agent causæ, ipsas nunc lustrabo. *Causa immediata & proxima est motus*, quem ipsa *aut. V. a* non solum quoad exteriorem regionem, sed & in vivorum sectione animalium scrutatio interiorum monstrat. Motus est *depravatus*, quia hæc naturaliter excretioni destinata non est via, quia illa, quæ irritant ad naturalium classem minimè, sed ad p. n. spectant, quia motus ipse est *Convulsivus*; talem enim hic esse & formalis ratio, & subjectum, & causa docent. Tali in motu Ventriculi constringitur fundus cum lateribus, quasi obvolvitur, invertitur, pylorus occluditur, sinistrum aperitur orificium, hæcque singula cum impetu fiunt, motum istum fibrosis Ventriculi corpusculis instituentibus. Hic motus est Ventriculi irritati; Facultatem alii irritari dicunt, alii Archæum, quod per me licet; Posui ego *Spiritus animales* suo instructos præside, quia naturalis Ventriculo non penitus denegandi motus causa sunt, hinc etiam p. n.

IV.

Res autem irritantes, talem molestiam inducentes, ut in illum & non alium agatur Ventriculus motum, variæ sunt: *Spirituosæ s. Vaporosæ, Humorosæ & Solidsæ*. *Vapores*, Halitus, Flatus, è minera p. n. effervescentiâ degenerante, exurgentes, haud rarò hoc præstant, conatum aliquando vomendi inanem, aliquando vomitum vel ciborum ac potus, vel succi laudabilis, vel illius mineræ, vel per compressionem & motum istum bilis ac Pancreatici succi inducentes. *Humorosa* frequentissime, modò sulphureis, salinis, acribus, volatilibus, fixis nimis activis, modò depressioribus, austerioribus, minus activis, modò hac, modò illa textura ac figura, modò serosis, modò biliosis, modò pituitosis, melancholicis particulis tinctæ, irritare dicto modo solent. *Solida*, præsertim alimenta, sæpe idem agunt. Et quidem singula hæc *qualitate* aliquando *irreducibili*, aliquando *reducibili*, aliquando *quantitate*, aliquando *motu*, *loco*, nunc uno, nunc pluribus horum modorum lædendo.

V.

At, unde ista causarum *scaturigo*, unde ista ipsarum dispositio, textura, variæ *Celeberrimorum Authorum* sunt sententiæ, quos veneror singulos. *Mibi* videtur, per conceptionem, quam in descriptione posui, non solum massam sanguineam cum spiritibus quæ particulas suas

multum immutari per istam liquoris maris genitalis spirituosum cum ovu-
 lo sive vesicula foeminae conjunctionem, sed & cessare istam menstruo
 tempore, per singularem effervescentiam, turgescientiam, & per ute-
 rum evacuationem alias solitam, obviarum si adsunt in sanguine parti-
 cularum heterogenearum cum ipso educationem. *Illud* ista, quae mox
 post conceptionem factam obveniunt mulieribus symptomata aut al-
 terationes, carniū brutorum mox post conceptionem mactato-
 rum immutatio, actionis ipsius singularitas, & spirituosorum in hu-
 mano corpore maxima vis docent: *Hoc* particularum in fervorem
 s. turgescientiam agentium immutatio, defectus, ipsarumque uteri fi-
 brarum, tubulorum & ductuum aliena dispositio efficit, & pro-
 bē sanarum à tali Vomitu libertas suadet. *Dubium*, quod Vomi-
 tus in iis, quibus etiam graviditatis tempore fluunt menses, obser-
 vetur, solvo, primò: Rarum est, fluere isto tempore menses. 2. Ra-
 rissimum, tales vomere. 3. Si Vomunt, è causarum adductarum biga
 priorem prædominari certum est. Et hæc dumpono, non contradi-
 cere me censeo iis, qui fermentum heterogeneum in sanguine ponunt
 causam huius Vomitus, qui Spiritus circa fœtus formationem in utero
 occupatos, Ventriculū ac primæ digestionis negotium deserentes,
 inde caractere vitali destitutos, crudos humores genitos & Ventricu-
 lum laceffentes accusant. Non autem sentire idem cum illis, qui sub-
 sistentem, impurum, corruptum sanguinem menstruum accusant. Mo-
 dum autem conceptionis hîc desiderantem, cum ea huc non spectet
 controversia, ablego ad Naturæ Consultissimos, Bartholinos, Barbat.
 Bohn. Diemerbræck. Dolaum, Elsholtium, Harveum, Hornium, Ker-
 krig. Malpighium, Ruyschium. Stenonem, Sladum, Schrammerdamm,
 Wedel. Wepfer. & Alios. *Harvæana* vulgari modo exponi solita ma-
 gnis mihi videtur Medicis, Philosophicis & potissimum Theologicis
 premi difficultatibus.

VI.

Illa a. sanguinis ac spirituum per conceptionem immutatio faciles
 invenit vias, facilem monstrat modum; spirituosola enim, si pori vagi non
 arident cuiquam, per vasa tamen huc illuc ferri nullo negotio, spiritus
 corporis nostri per unanimum conspirationem se invicem afficere, sub
 tali naturæ Conamine, sub tali maris & foeminae actione possunt. Mo-
 tum autem istum, concussionem, copiosiores spiritus affluentes, calo-
 rem

rem largiorem, solum pro causa non adducerem, quia singula hæc in coitu, nulla subsequente conceptione, adsunt. Dum igitur illa fit spirituum & Mæ. Sæ. immutatio, dum illa depuratio solita cessat, Ventrículus varia etiam tingitur labe. Hic enim non infimum corporis nostri viscus, maximas in ciborum mutatione, medicamentorum actione, communicatione & cudentis morbis exerens vires, & hoc in casu multum quæ temperiem vulgò dictam potissimum, imò & haud rarò conformationem & unitatem immutatur modò hæc modò aliarum particularum textura & dispositione, unde aliquando nostro symptomati, Nausea, fastidium, aliquando Pica jungitur, aliquando appetitus viget, sed semper tali, quæ spiritus in istum agat motum. Sæpius autem à proprio immunis vitio ab illuc sive ab extra per os, sive ab intra cum sanguine, sero, aliisve humoribus, vaporosis item variis ac spiritibus inquinatis, communicatis rebus molestantibus, irritantibus, huic malo se exponere cogitur. Tales autem particule nunc denuò gignuntur, nunc genitæ sed subjugatæ moventur, paucae cumulantur per istam immutationem; Genitæ nonnunquam antequam maturitatem adipiscantur debitam, latent aliquandiu. An *Acidum*, an *Alcali*, in talibus agat, si sciscitaris, utrumque prout communiter describuntur, admitto, in eam tamen exaltatum acrimoniam, ut hunc spasmodicum inducat motum. Haud rarò tamen sola irritat nimia quantitas. Cum autem istæ cessant, desinunt aut immutantur causæ, mox etiam cessat effectus. Quomodo ex ista causarum biga alia etiam gravidarum deducenda symptomata, aliis relinquo.

VII.

Juvant has causas adductas quamplurimæ, *Res Naturales* & quidem inter has *Temperamentum*: Aptius est id, quod magis recedit à debita calidi, spirituum & sanguinis dispositione ac textura, accedit verò propius ad degenerationem istorum, quæ irritare solent. Inde, quæ cacochymo & impuro præditæ sunt corpore, proniores ad hoc symptoma sunt. *Ætas*, quæ nimis juvenilis adhuc in quibusdam foeminis Venerem jam exercentibus in tantum ad tale disponit malum, quantum tener earum habitus, nondum adhuc huic sufficit actioni, unde totum corpus faciliè pervertitur. Cum in quibusdam gravidis augeatur malum cum numero etiam mensium in gravidationis, suspicari licet provenire id à sæpius repetita in & expiratione cum ea iis non amplius detur

tur perfecta ob molem foetus totum abdomen, cuius incola etiam V entriculus, implentis, & per consequens diaphragma sursum pellentis, inde & pulmones comprimuntis, unde hi crebritate compensant, quod uno naturali actu aliàs solito iis denegatur, ita ut à levi aliquo heterogeneo Ventriculus jam à compressione & frequenti pulmonum motu irritetur perfectius, agaturque in motum hunc depravatum. *Hæreditariam dispositionem* non raro quid hic valere observavit *Excell. D. Preses. Vita sedentaria* huc etiam quid confert, hinc rusticis & laboriosis foeminis malum hoc tam familiare non est.

VIII.

Sequuntur *Res Non-naturales* & primò quidem *Aër* pro ratione temporis multis excedens modis, nunc humidior justo nunc siccior, nunc copiosior, nunc paucior, interdum & impurus variis heterogeneis miasmata tinctus, omnibus tamen modis irritans. *Cibus & potus*, qui vi gaudent maxima gignendi morbos, unde Authore *Fernel. lib. 1. pathol. c. 14.* una gula omnium propè morborum est Mater; quod dictum si nullibi, in gravidis tamen magni est valoris, cum aliquando præ aliis sequioris sexus suis nimium indulgeant affectibus, & immoderatè non solum in cibos & potus cujuscunque generis, sed & alia insolita ab appetitu ferantur depravato, unde quantitas, qualitas, modus, & alia alimentorum adjuncta peccantia nolentem volentem Ventriculum irritant, & ad suam quasi inversionem sequi cogunt, haud raro immediate irritantis causæ vicem subeuntia. Quid efficiant in hoc promovendo malo *Motus & Quies* nunc in excessu, nunc in defectu, tota die obvium est, motus quidem excessivus Massam totam sanguineam agitando, spiritus turbando non solum, sed & consumendo: Quies non licita transpirationem & exhalationem fuliginum impediendo, spiritus quasi supprimendo, ac ita saburram vitiosorum humorum cumulando, unde hi tandem acriores fiunt ac irritando nervosas partes lædunt; cum his pari modo agunt & *Somnus & Vigilia. Animi Pathemata*, ubi quædam consistunt in expansivo spirituum motu, unde subitæ irritationes, quædam in concentrativo ubi quasi ad unum vocantur, unde orgasmus in interioribus oritur, itidem inversionis parens, quædam mixto jactant motu, non nihil hic agunt. Claudunt has res *Excreta & Retenta*, quale autem huic malo hæc addant momentum prodit duplex eorum modus agendi, quatenus excernuntur

nuntur retinenda, ac retinentur excernenda, aut debito modo ac quantitate non excernuntur. Non inanem etiam causam suadet ratio Veneris usum, cui indulgent sæpe nimium mulierculæ in primis duobus vel tribus mensibus, interdum insciæ imprægnationem esse factam, cum ergo jam antea talem Characterem sibi impressum habeat habitus gravidæ, non mirum si crebrior Veneris repetitio etiam auget malum; nec ipsa hic deest experientia, si enim apud *Rolf. Cons. lib. 2. Cons. 12.* Epilepticam dispositionem auxit, quod Mater tempore gestationis Veneris exercitiis miris modis fuerit delectata, quid obstat, quo minus & hoc fiat tanquam minus & levius Epilepsiâ malum.

IX.

Quanto conatu agant in promovendo hoc malo res p. n. quam plurimæ, vel vitio conformationis, unitatis solutæ, vel intemperiei, Medicorum notant Observationes; viscus quodvis, pars quævis, suo non fungens officio, proprium corrumpens alimentum, tales inimicas ventriculo transmittere valet particulas. An maritorum morbi in augenda hujus mali causa, præsertim eorum vomitus quibus interdum quotidie laborant, aliquid conferant, non dubitandum, cum id commodè fiat communicatione particularum spirituosarum per liquorem genitalem, qui secundum *Excell. Wedel. in physiol.* est quinta quasi essentia, extractum humorum, elementa & ideam hominis continens.

X.

Non omnis tamen Gravidarum Vomitus *uniformis* est. *Quidam* enim vehementem, *quidam* levem junctam habet molestiam, pro ventriculi dispositione, & materis excernendæ aptitudine vel ineptitudine: *Alius* invadit gravidam manè, *alius* vespere, noctu *alius*, *alius* post prandium aut coenam; *alius* quavis ferè hora; *alius* certum observat typum, *alius* nullum, *alius* educit copiosam materiam omnemque ingestum cibum; *alius* tantum viscidam quandam & paucam; ab *alio* benè se habent gravidæ; ab *alio* malè; *Alius* incipit ipso quasi conceptionis momento; tardius *alius* præterlapsis aliquot nunc diebus, nunc septimanis, nunc uno vel altero mense; durat *alius* nunc per totum imprægnationis tempus, terminatur *alius* in primis vel mediis statim mensibus, pro diversa ratione subjectorum, liquoris genitalis, ovulorum, conceptionis & accidentium aliorum, pro tempore imprægnationis. *Ejicitur in hæc Gravidæ Cibus, Potus, in alia chylus, in ista biliosa Collu-*

vies, in illa pituitosa saburra, in altera sanguis etiam sive purus & mixtus, in Quadam variorum miscela humorum, sæpè sponte absque insigni conatu aqueus humor efficitur. Rarissimus est casus, quem observavit *Curiosiss. Scharsius & Eph. G. Ann. 9. & 10. in observ. 6.* tradit de muliere, quæ à primo conceptionis mense usque ad ultimum singulis diebus vomuit sanguinem nonnunquam floridum, nonnunquam aliquatenus coagulatum, in satis magna & unc. 8. quantitate, sine tamen noxa vel graviori læsione, integra cæteroquin valetudine usa.

XI.

Vomitum ipsa Medico detegit Ægra consilium petens. Ast, an à graviditate, an ab alia causa, prudentis discernere est Medici. Remitto ad *Practicorum & Gynaciorum* libros, ubi prolixè graviditatis recensentur signa non hic exscribenda, quæ tamen ceu in quibusdam non paucis casibus, sub priorum tempus mensium infallibilia non sunt, ita & primo mox tempore Vomitum ab imprægnatione oriri vel affirmare vel negare nequit Medicus, usque dum cum tempore certior fiat; In quibusdam dixi Casibus. Aliquando, licet rarius, Vomitus jungitur falsis conceptionibus; Adsunt enim nonnunquam graviditatem mentientes molæ variis figuris, textura ac aliis adjunctis præditæ, ovum, quod post excluditur, gestantur varia in utero animalia, decipit sub imprægnationis specie Hydrops, extendunt Ventrem tumores, abscessus & similia, Æolius & Anemius partus, de quibus plures notatu dignas observationes vid. in *Eph. G. Ann. 1. observ. 1. Schol. Ann. 3. observ. 218. Ann. 6. observ. 45. Act. Hafniens. Vol. 2. observ. 3. Mæb. Med. physiol. c. 20. & Curiosiss. Schröckij Scholio ad Hellwigij observ. 124.* Signa discernantur, quæ uni vel alteri tali affectui propria sunt, recessita locis dictis. Potissimum perpendendum, an Molæ aut alterius affectus signa absint & imprægnationis adsint, Medico; nam mulierculæ absque hujus consilio falluntur frequenter, imò etiam ab ipsis Medici non debitè, sed secundam suam opinionem referentibus. Rariores autem tales sunt casus.

XII.

Malum hoc primo intuitu per se ita consideratum non adeò videtur periculosum: Non adeò malus est is, qui accidit Vomitus jejuno Ventriculo, qui absque singulari fit molestia, cum enim natura

sui

sui sit studiosissima, id tantum eam ejicere in illo Vomitu credibile, quòd secretum jam in Ventriculo à laudabiliore materia ineptum plane ad ulteriorem coctionem, foetusque nutritionem judicavit. Post tertium sæpè mensem spontè desinit. Qualiscunque sit, quæ ejicitur, materia, haud rarò à provida natura & robusta ad Matris & foetus salutem educitur; Quantum in Gravidis naturæ aliquando sit robur, præter alios plures docet casus quem cum *Angelo Colio Senensio philosopho in Nosocomio S. Spiritus Romæ observavit Ioh. Faber. Lynceus. Exposit. in Nardum Recchum f. 493.* dum, quamdiu gravida foemina, Natura Rabidæ canis morsus venenum subjugavit, à partu ipsa subjugata. Hinc *Nicol. Rocheus de morb. muliebr. curand. c. 24.* quarto mense picam quiescere dicit, partim, quod vomitione vitia- ti humores expurgantur. *Hippocrates definit f. 1. aph. 2. In Vomitibus spontaneis si talia purgentur, qualia purgari oportet, confert, & leviter ferunt.* Tales prægnantes plerumque habere foetus pulcherrimos, quia nutriantur per Vomitum depurata sanguinis materia, perhibet *Hæferus Herc. Medico l. 7. c. 3.* A levamine per hunc Vomitum argumentari nimios Vomitorium Patronos conqueritur Ventriculus apud *Smalve p. 210.* Sed contra minatur periculum, qui immediatè vel prandium vel coenam excipit, omnem iterum educens cibum, qui mox in alimentum foetui cedere debebat; Qui nimius est tam quâ quantitatem, quàm conatum ac motum ipsum, ceu enim quæcunque valida evacuatio abortum procurare potest, monente *Heurnio de morb. mulier. c. 7.* ita talis potissimum Vomitus Immoderatus, ut notat *Massarias. Prælect. de morb. mulier. c. 11. pag. 331.* *Barthol. cent. 1. hist. anat. 19.* in summo vomendi conatu, quo uterum gerentes miserè sæpius exercentur, Venulam in faucibus non rarò rumpi suspicatur. Qui gravia alia juncta habet aut inducit symptomata.

XIII.

Accingenti ad Curationem obvenit locus *Epiphan. Ferdinandè Hist. 13.* Semper dubia, difficilis, gravis, anxiosa, est gravidarum cura, neque semper æquale impendit periculum: quare semper cum plumbeo pede ambulandum esse reor, ac omnia agenda cum præmeditatione. *Platerus Pract. l. 3. p. 802.* monet diligenter observandum, si prægnantibus

ribus mulieribus contingat Vomitus; ut omittantur medicamenta, quæ illas incommodant. Sæpius planè nullam requirit curationem Vomitus de quo agimus, & sic nihil agendo rectè agit Medicus, cum nimè educuntur educenda, gravidæ nullam planè exinde experiuntur molestiam, citra etiam virium jacturam, si ab illo melius habent, quod præsertim in matutino Vomitu, quem provida natura ad sui procurat conservationem, fit, aliquando ne gravius malum causâ nobiliori parti gravius adhærente accersatur. Ille autem, qui manifestè corpus lædit, matrem & foetum enervat, ut dicit *Sebizius man. pract. p. 5. s. 3. c. 5.* qui nimius est & periculum minatur, indicat sui remotionem, nonnunquam mitigationem, quod agit Medicus morum inhibendo, causas irritantes imminuendo, temperando, immutando, enerrando, Spiritus & Ventriculum roborando, demulcendo, sopiendo aliquando; quæ executurus è triplici communiter proposito penu depromit auxilia.

XIV.

Ex Chirurgicis autem remediis primò sese offert V. S. quæ an conducat omnino in gravidis controvertunt *Authores*: nimis impetuofus sanguinis motus, effervescencia nimia & plethora si adest utique V. S. conducit. *Laz. Riverius*, inquit: *Experientia docuit Vomitum, qui frequenter pregnantēs (loquitur de plethoricis) infestat, à S. M. plurimum sublevari imò in totum auferri, si usque ad solutionem symptomatis singulis mensibus iteretur.* Posteriori quidem modo *Nostrorum Medicorum* non subscribit praxis. Cum sanguis impurus aut rancidus materiæ incongruæ penum subinde novum Ventriculo suggerens diathesin Emeticam infert, Gravidarum Vomitiones hoc remedii genere crebro sanari testatur *Willis. pharm. ration. sect. 2. cap. 3.* & cum illo *Excell. Bonetus Q. compital. p. 731.* Venam autem non tali, sed brachii aut manus eligere solent. Salvatellam dextræ manus tundere jubet *Mercatus de Mulier. affect. l. 3. cap. 12.* Suam etiam hic laudem merentur, *Cucurbitula Scarif. Fonticuli, Hirudines ac Vesicatoria*, cum omnia unum eundemque agnoscant fontem, ex quo hauriant & educant, M. scil. sanguineam. Tutior autem sanguinis missio in mediis quàm primis mensibus administrata (nisi adsit summum periculum) ob metum abortus quæ à commotione, agitatione, & secundum *Avicennam 4. l. c. 20.* contur-

batione

batione sanguinis ejus missione procuratâ , maximè metuendus , præsertim cum foetus in primis mensibus adeò tenellus sit , ut ex quacunque causa possit periclitari. Constrictiones manuum & pedum præsertim à cibo , & frictiones laudat H. *Crualis d. morb. mulieri lib. 1. c. 4.*

XV.

E *Pharmacia* depromimus *Vomitoria* , quæ rarissimè conveniunt , cum nimir. copiosa materia non evacuetur per hanc aut aliam viam , huc inclinat & ægras valdè torquet ac urget. Lenissima autem si opus , dentur , vel propriè dicta , vel lubricantia. *Curiosissimus Hægendornius* prægnantem à Melancholia hypochondriaca vomitorio liberatam tradit *Eph. G. Ann. 9. & 10. observ. 53.* Non autem ibi junctus erat Vomitus. Sin per *Alvum* copiosam talem materiam educere animus est *Medico* , Lenientia exhibeat ubivis obvia. *Diuretica* (non nimium menagoga) & *diaphoretica* *Mam Sam* & in hoc casu ab heterogeneis liberare particulis educendo valent. Maximum hîc conferunt momentum non tam *Evacuantia* , quàm *Alterantia* modis antea dictis in causam morbificam agentia , simulque modicè in omni casu adstringentia s. fibrarum tonum roborantia , Spiritus in ordinem redigentia.

XVI.

Causæ nimiam acrimoniam corrigunt , immutant , enervant unaque adstringunt & Spiritus mitigant , motum refrænant frequentius *Excellentissimo D. Prasidi* præscribi solita in *Colleg. privat. commendata. Lap. 69. CC. crudum & preparatum variè. Tunic. ventricul. gall. anicorn. utrumq. Ebur. Fl. balauft. pap. err. ros. r. L. Santal. r. Corall. Crystall. Hematit. Bol. arm. Crualia quedam. acetos. agrest. acetosell. fol. querc. burs. past. plantag. tormentill. bistort. mastich. el. grana. cherem. sem. pap. alb. Berberes. mal. granat. citr. cydon. terr. figill. acet. ros. rubr. Varia ex his & similibus composita. Spiritus restaurant , succitant , vigorant , viscidum mucum immutant , simulque villos roborant *Castor. cort. citr. arant. cinam. croc. macis. nux m. Garryophyll. bacc. junip. Bals. de Per. absynth. utrumque. card. b. menth. lign. Aloës. saffasr. ambr. gry. rad. acon. ari. china , zedoar. zinzib. sem. anis. fennic. N. indie. condit. vin. malvat. & ex his parata Varia. Ol. nucist. B 3 expres.**

express. grano minus in jusculeo calido exhibere, frequenter *Trag.* pro *pregnancib.* ante laudata *absorbentia* miscere solet *Exc. Dn. Preses.* Juvant hæc & similia medicamenta, dum ventriculo communicata spiritus quieti ibi dant (unde & alibi in corpore tranquillatur) chylum, fermentum, & alia quæcunque contenta corrigunt, sanguinem etiam per circulum continuo allabentem immutant, & , nervis ibi roboratis, per conspirationem alii etiam solamen accipiunt, imò & sanguini per vias ordinarias aliquid communicari nullus dubito. Acidulæ & Thermæ sub extraordinario at debito modo ac regimine & hic in usum vocandæ sunt. Cum valdè urget vomitus gravidæque ita affligit, ut metus non inanis adsit abortus, *Sylv. Prax. l. 3. c. 6. p. m. 536.* ægras vocat ad *Opiata & Narcotica*, utpote sensum omnem obtundentia, humorumque acrimoniam temperantia, nec non eorum vitiosam effervescentiam comprimantia, quo pacto felicius tum remedia alterantia, tum ipsa alimenta assumi credit. *Papaverea* cum aliis mixta magnam hic merentur laudem. Quo autem modo quæve formula interna hæc debeant propinari, non inutilis videtur quæstio; Respondetur autem respiciendam esse & consuetudinem ægræ in assumendis medicamentorum formulis ejusq; dispositionem; omnibus autem formulis *Exc. Wedelius de compos. medicamentorum p. m. 120.* præfert pilul. in affectibus ventriculi ex hac ratione, quia diu manent in ventriculo & eidem sunt acceptæ, adeoque intimius ibi vires suas explicant; id quod eo melius, quia ita sensim sensimque in fermentum peccaminosum à Ma. sanguinea ope circulationis continuo ventriculo communicatum, agere, ac ita hoc magis corrigere possunt. Conducunt & pulveres. Potiones exhibentur confortantes & aromaticæ, similiumque virtutum *Eleuaria.*

XVII.

Externæ res peragitur Emplastris, Unguentis, Balsamis, Cataplasmatibus ac similibus, ipsius ventriculi regioni tam anteriori quam posteriori ex *Avicenna* Consilio applicandis ut sunt, ol. *Mastich. cydon. nucist. expr. lumbric. Bals. de Per. empl. de tacamahac. crust. pan. tost. absynth. & acet. ros. rubr. conspers. pulm. ex cydon. & placent. mellit. c. vin. malvat. & similia.* *Morimus Akiskias d. morb. mulieb.*

l. 2. cap. 3. languere stomachum gravidarum dicit propter frequentem vomitum, & hinc roborandum. Tanquam certum experimentum commendat tabulam eburneam ventriculo applicitam *Louyse. Bourgois. d. obstetric. l. 4. c. 30. La Commare dell Scipione Mercurio*, Mala citr. arant. granat. masticare & iterum exspuere jubet *d. obstetric. part. 1. cap. 22. Excell. Welschius in Scholiis à cibo cochlear aquæ cinamom. cydoniat. commendat.* Omne remedium genus hîc superare Decoctum majoris chamæmeli scribit *loh. le Bon. Therap. puerperar. partic. 6.* Vinum Cydonior. laudat *Camerarius de gravid. & parturientib. part. 1. particul. de Nausea & Vomitu.* Herlicius *d. cura gravid. puerperar. & infant. cap. 16.* pedes & manus frigida in causa calida, in frigida verò calidæ immergere jubet aquæ; & postipsum *Pfizer de mulier. constit. & morb. l. 2. part. 5. cap. 3. Syr. de Agrest. Hiltprand. de gravid. & obstetr. part. 2. cap. 11.* singulare mustum præscribit *Lud. Bonnaciol. Ennead. muliebr. cap. 4.* Sorba assumpta *Forest. observ. libr 28. Schol. obs. 45.* *Pictorius* elegantem Tragæam ex Corall. alb. & rubr. fem. Coriandr. lign. aloes. Galang. Garyophyll. Spec. rosat. novell. diarrh. abb. Cinnamon. & Sacch. suadet *de gravid. c. 17.*

XVIII.

Claudit agmen *Diata* plerumque in hoc malo primum tenens locum, hæc enim sæpè si stringitur, Vomitus istum absq; aliis compescit medicamentis: A cibo peptici juvant pulveres suadente *Sennert. prax, l. 4. part. 2. s. 5. c. 4.* Levamen querant ægræ in legitimo & rerum nonnaturalium usu, ac affectibus suis frænum injiciant; præstat in Vomitu illo prandium vel coenam immediatè excipiente, sæpius in die sed paucum & bonum edere, ut tamen aliquid sensim sensimque pergere possit in nutrimentum & foetus & matris. Pro causæ diversitate bibat Hæc frigidam aquam, Alia vinum, aliquando etiam aromatisatum *Hippocras* vulgò dictum, *Malvaticum.* Vinum rubrum, in quo Oum, vel chalybs, vel filices ignit. extinguit. pro cibo, digestu faciles carnes, volucrum, assas potius quàm elixas, pyra, Cydonia commendat, pinguis vitare jubet *Hebenstreit. de semin. partur. & obstetric. part. 1. artis. 1.* Cibis boni succi modicè ac sæpius offeren-

serendis recreari præcipit *Feyneus practic. l. 4. c. 62.* Reliquæ res
non naturales quomodo dirigendæ ac earum usus moderandus,
ex supra dictis causis facile patet.

Tantum !

Sit D E O Gloria.

EVomat ignitos, gelidos, Morbona tremenda
Morbos: Prudenter Tu medeare Gravis.

Hortatur

PRÆSES.

NAuseat ad Cybeles Vomitum, quo polluit auras
Progenies Matris, viscera avara timens.
Quæ prius Ambrosiam, nunc eructare venenum
Ubera sicca stupet, quin gembunda fugit,
Forſan & Hippocratis, quod plenis evomit atrum
Emulſum buccis, ſorbet anhelæ ſitis.
Non huic quæ geminat ructus, vomitoria debes,
Sed gravidæ Vomitus, carcere claudis acri.
Scilicet hæc Miſeræ Matris, qualem æquoris æſtus
Conſimilem jaçant, vincula venter amat.
Poſcit opem pallor, rorantia lumina frontis
Implorant, fracto guttura rauca ſono.
Succurre, & facies roſeo ſuffuſa rubore
Grataque Te Medicum garrula turba, beet.

ita

Nobili & Clarifſimo Dn. Respondenti
gratulabundi acclamant,

Commenſales.